



El sport el dia a tegni aduna ra nostra vales; ra Union Generela di Ladins dla Dolomites in Anpezo col vize presidente Fernando Brunel, par ra final de hockey, venta da i anpezane de r'Hafro Cortina.

## Su ra jaza de ra Dolomites

Intrà Anpezo, Fascia e Gherdeina da doi ane se suia el Torneo Ladin, vorù da ra tre sozietas, co ra Union Generela di Ladins dla Dolomites, intrà sport e cultura

— Deplù a plata 3

HOCKEY

## Su ra jaza de ra Dolomites

Intrà Anpezo, Fascia e Gherdeina da doi ane se suia el Torneo Ladin, vorù da ra tre sozietas, co ra Union Generela di Ladins dla Dolomites, intrà sport e cultura

Par el 2019 'l é r'Hafro Cortina a venze danoo el Torneo Ladin de hockey su ra jaza, terza edizion; 'l aea vento anche 'l an pasà d'istade e inveze 'l ea stà chi del Gherdeina a venze el prin, de febraro del 2018. I anpezane i à mostrà de ese ben pareciade par ra stajon de ra Alps hockey league, che ra scomenza ai 14 de setembre, par ruà fin de aprile del 2020, con disdoto scuadres, intrà Italia, Austria e Slovenia. I anpezane i à vento 6-1 r'ultima partida, che i à suia i ciasa, contra el Gherdeina; manciaa alcuante tostate, a scomenzà dal portier Marco De Filippo Roia, e 'pò Luca Zanatta e David Cordiano, par chesto 'l alenator Giorgio De Bettin 'l à abù da fei lourà depi chi outre sògadore. »Dute i tostate i s'è fato ciatà pronte par chesto torneo e i à mostrà de podè fei 'na bona stajon; dute à mostrà de aé tropa voia de suia e

chesto 'l é chel che conta depi. Par chesto torneo ón vedù suia polito dute i soen de ra nostra vales. El trofeo 'l ón ciapà nos, ma a venze 'l é stà el sport ladin, de ra Dolomites» – 'l à dito Silvio Bernardi Agnel, presidente de ra Sportivi ghiaccio. A ra fin de ra partida i à sporto el premio par el meo sògador a Riccardo Lacedelli de Mente, par i anpezane, che 'l à segnà tre gol, e el portier Leo Kostner par el Gherdeina. S'è suia par deboto doa setemanes, da i 12 a i 23 de agosto. I à scomenzà intrà Fascia e Gherdeina, co i Falcons che à vento doa otes, ignante in ciasa, al Gianmario Scola, par 4-3, e dapò al Pranives par 5-4 ai rigore. Vendres 16 de agosto 'l à tacà el Cortina, in ciasa, a venze 5-1 sul Fascia; ai 19 i anpezane i é sude a venze in Gardena 4-1. Alolo dapò, par r'ultima partida in Fascia, i Falcons à vento 4-2 contra i



I tostate de Giorgio De Bettin i venze par ra seconda ota el Torneo Ladin; ra prima edizion r'ea suda al Gherdeina. Chesta manifestazion r'è inze algo depi del sport.

anpezane, che però i aea ancora r'ultima partida in ciasa, ai 26 de agosto. Fenida 6-1 contra i gardener. A ra fin de ra partida, su ra jaza de 'l Olimpico 'l ea Fernando Brunel, vize presidente de ra Union Generela di Ladins dla Dolomites, e alcuante ome e femenes de ra Union de i Ladis d'Anpezo, co ra vize presidente Rosetta Lorenzi.

»Ades stajon a vede ce che suzede in Alps hockey league – sonta pede el presidente Bernardi – speton de saé cemodo che sarà i sògadore foreste, speron che i rue ben pareciade: coscita i aon domandà de fei. Son parsuašo de vede ra squadra che cresce, i mesc che vien. Speron che negun se feje mal, algo 'l é suzedù, ma roba da nuia. Son

parsuašo che ra nostra ra see 'na bona squadra. Speron che ra sente ra viene a me vede, parcé che nošoutre fajaron de duto par sporše algo de bel».

Marco Dibona Moro

SPORT E MENDRANZES

## Evenc che arvejina la valèdes

L'Union Generela di Ladins dla Dolomites, che à dat si patrozine al Tornei Ladin Elite de hockey fin da la prima edizion, à palesà sia sodesfazion per ousc del vizepresident Fernando Brunel

Ence a chesta terza edizion del Tornei Ladin Elite de hockey l'Union Generela di ladins dla Dolomites no à volù fèr mencià sia prejenza. Chest'outa l'é stat l vizepresident de la soziazion, l president de l'Union de Fascia Fernando Brunel, a portèr sia paroles de salut en ocazion de l'avertura del tornei, stata tel stadie Gianni Scola de Dèlba en lunesc ai 12 de aost dant da la prima partida anter Fascia e Gherdeina, e ence a tor pèrt a la zerimonia de premiazion en vender ai 23 a l'Olimpico vin Ampez.

E chiò ben segur l raprejentant fascian de l'Union Generela aessa sperà de poder ge dèr te man a la squadra de sia val l bel trofeo, che Robert Senoner da Freina de la firma Rowi de Selva aea pissà e realisà aposta per chest tornei. Enveze l jador de legn, che te la prima edizion era restà te Gherdena e l'an passà era jit te man del Hafro Cortina, l'é restà vin Ampez, ence se i fascegn te chesta edizion no i à segur fat burta fegura su la giacia. Fernando Brunel à recordà che l Tornei Ladin Elite de hockey era stat endrezà la prima outa mingol de prescia al scomenz de firè del

2018, per corir n »busc« lascià tel calandèr del maor campionat de hockey su la giacia a cajon de la Olimpiada de Pyeongchang. La trei squadres ladines de Fascia, Gherdeina e Ampez, che fèsc pèrt dutes trei de chest campionat, les à abù la bela pissèda de meter ensema n program de partides da ge meter dant ai ghesè e tel medemo temp creèr na ocazion de fèr crescer gaissa e agonism anter l publich de cèsa, endrezan n tornei dut ladin. L'Union Generela à tout sù sobito con piajer e gaissa l'envit a fèr la "nona" de chest event, che dapò l'é stat spostà sul calandèr a

l'istà, doventan coscita ence na ocazion per la squadres de miorèr l'arcedament e proèr la dinamiches de squadra dant dal scomenz del campionat.

Aldelà de l'ejit agonistich, Brunel à palesà sia legrezza per chest event che à troà te chest temp de fin de l'istà sia posizion otimala, e che donca segur l vegnarà fat ence ti egn che à da vegnir, e l'à recordà l valor che pel aer l ladin e la tradizions ladines te vigni ciamp, ence tel sport. L binomie sport e cultura l'é ideèl per arvejinèr i joegn e chest event ge va dò al troi che l'Union Generela aea envià via del 1985, en ocazion di 2000 egn di Ladins, con l'endrez de scontrèdes e competizions sportive anter i joegn de la desvaliva valèdes.

Chesta sort de scambie e confront à abù amò desvalives e jempies garatè, ti evenc sportive de scoles e studenc, o te la squadra

interladina de balon che à tout pèrt ence a Europeada.

La speranza de l'Union Generela di Ladins dla Dolomites – à dit amò Brunel – l'é che evenc desche l Tornei Ladin Elite de hockey posse se slarièr fora ence a etres setores del sport. Per fèr chest tant fossa emportanta na cordanza con la sozietèdes sportive de duta la Ladinia.

L'Union Generela ge fèsc donca i compliment ai venjidores de chesta edizion del Tornei e la ge disc amò n bel deelpai a la trei sozietèdes ladines de hockey: al Gherdeina con sie president Walter Ploner (Baldo), al Fascia con sie president Roberto Ongari e al Cortina con sie president Silvio Bernardi, e a duc chi che, daite o enlongia jù chesta sozietèdes, à pissà e volù chest event e i se à dat jù per l fèr garatè.» LG